

# Nokre sjeldne akutte utslett hos barn

AV ERLEND TOLAAS

Dei fleste utslett ein møter i ein almenpraktikarkvardag eller på ei legevakt er forholdsvis uskyldige, og dei fleste har god erfaring med å takle desse. Av meir alvorlege utslett, vil ein almenpraktikar reagerer raskt på petekkier som ein kan sjå ved meningokokksjukdom. I denne artikkelen presenterast eit knippe andre sjeldne utslett som ein, sjølv om dei er sjeldne, bør vere merksam på, og som bør vurderast ØH av hudlege og / eller pediater.

## I Eczema herpeticum

Ved eczema herpeticum blir eit atopisk eksem sekundærinfisert med herpes simplex virus type 1 (HSV-1). Ofte skjer dette i ansiktet, på halsen eller brystregionen.

Typisk finn ein utbreidde vesikler med sentral inndragning. Desse sprekk seinare med danning av utstansa småsår. Såra er sviande og smertefulle, og blir dekte av krustar eller kan flyte saman til større flater.

Viss det dreier seg om eit førstegongsutbrot av HSV-1, har barnet ofte allmensymptom med feber, irritabilitet og lokal lymfeknutesvulst. Ved seinare utbrot av HSV-1 kan allmensymptom mangle. Ubehandla kan eczema herpeticum utslettet breie seg også til hud utan eksem.



COPYRIGHT MAHMUD HILAZY, PH.D., DERMATLAS, WWW.DERMATLAS.ORG



**Erlend Tolaas**

Cand. med. UiB 1992  
Autorisasjon som lege 1994  
Kommunelege II i Bremanger Kommune  
1995–1999  
Hudavdelinga, Haukeland sjukehus  
mai 1999 – no  
Nøværende stilling: Overlege

### Viktige moment:

- Har barnet eller andre familiemedlemmer hatt «forkjølelsessår» / herpes simplex labialis?
- Rødt øye? Var for lys? Viss eczema herpeticum involverer nervus ophthalmicus (obs affeksjon av nasetippen) må øyelege raskt sjå til barnet for å utelukke keratitt.
- Aseptisk meningoencephalitt er ein sjeldan komplikasjon. Nakke- eller ryggstivhet / omtåka sensorium / irritabilitet?

Ved mistanke om eczema herpeticum bør barnet vurderast av hudlege og / eller pediater samme dag. HSV blir påvist ved dyrkningsprøver. Eczema herpeticum blir behandla med aciclovir i.v. Sekundære bakterielle infeksjonar blir behandla med antibiotika jf. resistensskjema.

## II Staphylococal Scalded Skin Syndrome (SSSS)

Barna som får SSSS er ofta yngre enn 6 år, og hyppigast spedbarn. SSSS skuldast i dei fleste tilfelle *Staphylococcus aureus* faggruppe 2, som dannar eit sirkulerande exotoxin

som gjev løsning av øvre delar av epidermis. Hos spedbarn kan desse bakteriane *kolonisere* nasofarynx, navlestump eller konjunktiva. Ein finn då ikkje alltid lokale infeksjons-teikn. Hos større barn finn ein ofte eit infeksjonsfokus, ofte hud. Før SSSS bryt ut kan barna vere irritable, ha feber, sår hals eller konjunktivitt. Huda blir så diffust raud og smertefull, ofte først i fleksurer og rundt kroppsåpningar. Innan ett til to døgn dannar det seg slappe sterile bullae som sprekk lett. Resultatet er «rynkete» hud som løsnar frå underlaget ved lett trykk / drag (Nikolskys teikn) med danning av fuktige erosjoner som minner om brannsår («scalded skin»). Nikolskys teikn er ved SSSS ofte til stades også på tilsynelatande normal hud. Allmentilstanden til desse barna er redusert.



BEGGE BILETE UTLÅNT FRÅ PROF. SVEIN HELLAND, HUDADELINGA, HAUKELAND UNIVERSITETSSJUKES

#### Viktige moment:

- Ved raud og øm hud, sjekk Nikolskys teikn.
- Leit etter infeksjonsfokus

Borna må hospitaliserast. Med penicillinase-stabilt penicillin intravenøst, adekvat hudstell og understøttande behandling går SSSS attende i løpet av ei til to veker.

### III Henoch-Schönlein purpura (HSP)

HSP er ein *systemisk* småkarvaskulitt av IgA-type hos barn i alderen 5–15 år. Hos to tredelar av pasientane finn ein holdepunkt for ein føregåande øvre luftvegsinfeksjon. HSP affiserer ofta hud, tarm, ledd og nyrer.

#### Hudfunn:

På setet og framme på leggane kjem det først raude papler, som i løpet av et til to døgn utviklar seg til palpabel purpura (petekkier og ekkymoser) ofte med svart nekrose i sentrum. Legg- og fotdødem er vanleg.



*Henoch-Schönlein purpura (HSP)*

COPYRIGHT FRANZ RITUCCI,MD, DERMATLAS, WWW.DERMATLAS.O

#### Symptom og funn fra andre organsystem:

- **TARM:** Buksmerter. Kvalme- og oppkast. Evt. gastrointestinal blødning.
- **LEDD:** Arthratt, ofte oligoarthritt i ankel- eller kneledd. Arthralgier.
- **NYRER:** Forbigåande mikroskopisk hematuri og/eller proteinuri hos opp til 50 prosent. Sjeldent nefritt eller nefrotisk syndrom. HSP gjev sjeldent kronisk redusert nyrefunksjon.
- **HSP** er ein uvanleg (3 prosent) årsak til akutt skrotum hos barn, og er ein differensialdiagnose til testistorsjon!

Pasientar bør vurderast av pediater og / eller hudlege, helst samme dag. HSP varer gjennomsnittleg i 3–4 veker. Prognosene er god. Behandlinga er i dei fleste tilfelle sengeleie, hydrering og eventuelt NSAID viss leddverk. Behandling med perorale kortikosteroider er omdiskutert.

### IV Kawasaki syndrom

Dette er ein *systemisk* vasculitt hos barn, der 80 prosent er yngre enn fem år. Kawasaki syndrom er ein klinisk diagnose som krev at eit sett av kriterier er oppfylte (sjå nedanfor). Ubehandla vil 25 prosent utvikle aneurysmer på coronarkar, med fare for seinare stenosering. Tidleg behandling med intravenøs immunglobulin og acetylsalicylsyre er effektiv og gjev god prognose.



*Kawasaki syndrom*

COPYRIGHT PETER ROWE, MD, DERMATLAS, WWW.DERMATLAS.ORG

Tenk på Kawasaki syndrom ved uavklart diagnose og følgjande sett av funn:

- Feber i minst fem døgn
- Utbreidt polymorf utslett, kan vere urticarielt, morbilliformt eller scarlatiniformt.
- Rødme og ødem i handflater og fotsålar. Skjeller av etter ca. to veker.
- Rødme i farynx, rauda og sprukne lepper, jordbærtunge
- Konjunktivitt utan puss
- Forstørra lymfeknutar på halsen.

Kawasaki syndrom er ein systemisk vasculitt som kan påvirke ei rekkje organ. Ein kan blant anna sjå leverdysfunksjon (stigande ALAT), diare, magesmerter og artritt.

Kawasaki syndrom kan mistolkast som eit viralt exanthem. Kawasaki syndrom kan også vere vanskeleg å skilje frå bakteriell infeksjon. Leukocytose og forhøga CRP er vanleg. Steril pyuri kan mistolkast som UVI.

Særleg spedborn kan vere irritable, og presentere eit ufullstendig sjukdomsbilete. Ved tvil om barnet kan ha Kawasaki syndrom bør barnet vurderast av pediater, helst samme dag.



## V Stevens- Johnson syndrom (SJS) Toxisk epidermal nekrolyse (TEN)

Dette er akutte og alvorlege reaksjonsmønster i hud og slimhinner med nekrolyse av heile epidermis. SJS og TEN blir i dag sett på som grader av same sjukdomsprosess. Den «mildare» SJS gjev løsning av < ti prosent av kroppshuda, overgangsformer SJS-TEN 10–30 prosent, ved TEN > 30 prosent. TEN og SJS er oftest medikamentutløyste, og startar då 1–14 dagar etter inntak. Sjeldan kan tilstandane vere kobla til infeksjonar så som Mycoplasma pneumoni, eller ein finn ikkje noko utløysande årsak.

### Klinikk:

#### Allmentilstanden til born med SJS og TEN er redusert.

Før debut av utslett kan borna i en til tre dagar ha feber, svelgsmerter / sår hals eller såre øye. Deretter kjem eit diffust raudt utslett, av og til kokarde-liknande («target lesions»), som så flyt saman til bullae og det løsnar store heilhudsflak.

SJS og TEN involverer slimhinner med hemorragisk sår danning på lepper, konjunktiva, munnhole, genitalia o.a. Dette i motsetning til SSSS og Kawasaki syndrom som ikkje gjev slimhinnnesår.



BILETE UTLÅNT AV PROF. SVEIN HELLAND, HUDAVERDELINGA, HAUKELAND UNIVERSITETSSJUKES

**For allmenpraktikaren blir hovedpoenget:**

- Rødt og ømt progredierande utslett med allmensymptom: Test Nikolskys teikn: epidermolyse?
- Sjå etter slimhinnesar (lepper, oralt, genitalt, konjunktiva).
- Medikament-inntak? (spør særleg etter antibiotika, NSAID, antiepileptika)

Pasientane må hospitaliserast umiddelbart, TEN-pasientar på brannskadeavdeling. Mortaliteten er 5–30 prosent. Behandlinga er først og fremst symptomatisk. Mistenkt(e) medikament skal seponerast. Vidare diskuterer ein nytten av tidleg behandling med høgdose intravenøs immunoglobulin.

Takk til kollegaer ved Hudavdelinga, Haukeland Universitetssjukehus, for gode innspel og kommentarer til artikkelen.

**Referanser:**

1. Bolognia et al, Dermatology, 2003
2. Wetzel, S. *Eczema herpeticum*, Hautartz 2004;55:646–652
3. Patel G. *Staphylococcal Scalded Skin Syndrome. Diagnosis and management* Am J Clin Dermatol 2003;4(3):165–175
4. Trapani S. et al *Henoch-Schonlein purpura in childhood: Epidemiological and clinical analysis of 150 cases over a 5-year period and review of the literature* Semin Arthr Rheum 2005;35:143–153
5. Jane C Burns *Kawasaki syndrome* Lancet 2004;364:533–544
6. Helle R *Risikofaktorer ved Kawasaki-sykdom* TDNLF 2004;124:1764–1766
7. Klevberg S. *Forekomst av Kawasaki-sykdom* TDNLF 2004;124:1774–1775
8. Sandaker Blom U. *Kawasaki-syndrom* TDNLF 2000;120:3540–3543
9. Sehgal V. *Toxic epidermal necrolysis (TEN) Lyell's syndrome* Journal of Dermatological Treatment, 2005;16:278–286

Evt. spørsmål og kommentarer kan rettes til: erlend.tolaas@helse-bergen.no

**Welcome to the 15th Nordic Congress of General Practice**

Reykjavik • Iceland • June 13-16 • 2007  
**www.meetingiceland.com/gp2007**  
E-mail: gp2007@hi.is • Phone: + 354 588 97 00 • Fax: + 354 588 97 01

The Icelandic College of Family Physicians

actavis

NORDIC FEDERATION OF GENERAL PRACTICE

DEPARTMENT OF FAMILY MEDICINE

Photo: Freysteinn G. Jonsson